

ᾠωυλόά Paulo Lówanlín Sísí
Efesofó

Itsiáha

¹ Mí Paulo ání Bulu apé su nabwé Kristo Yesu sumbí ɔyɔpú, dé ɔwuló ání wanlín sísí mli Bulu ahá ání mli lahɔ Kristo Yesu gyi, mliha munyɔ mli labwé kulɛ, mli bu Efeso wúlutɔ. Nde mli itsiá ha.

² Aní Sí Bulu mva aní Wíe Yesu Kristo bɔgyíi mli buale, abuha mli iwilwii.

ᾠsúsú Oyúla Ání Aníbu Kristotɔ

³ Mliha akanfu aní Wíe Yesu Kristo mu Si pú mu Bulu. Tsúfé tsun ania Kristonyɔ ikulɛbwetó á, alapú ɔɣétó atóá íbékpa aní fée yúlá aní tsú ɔsúsú. ⁴ Asa Bulu lóbwɛ ɔyí á, ɔlele aní bwé mu kle tsun ania Kristonyɔ kulɛbwɛsu, ání abwée ahá ání amú iwí letun, ifin kuku má aní iwí mu ansító.

⁵ Iníá Bulu tɔdwé aní su á, ɔlɔbwɛ agywun yáí ɔbéɛ, mópɔ aní bwé mu abí tsun Yesu Kristosɔ. Iní gyí tóá olekle, igyi mu apé ní. ⁶ Mliha akanfu Bulu, mu awitɔle anfi íbu numnyam, ɔlɔwa tsun mu Bi ɔdwepúsú há aní faan anfi su. ⁷ ɔlɔpɔ mu Bi ámu obugya ká aní nwunsu ikɔ, sí aní lakpan kíé aní. Awitɔle anfi Bulu léhiɛ wá há aní anfi íbu ifú dubi. ⁸ Mu nyánsa pú mu asún-asunu lalé mú fée ɔwan súná aní tsun ɔkpa tsɔtsɔtsɔsu.

⁹ Alahá anilabí mu asun ɣáinhé ání ɔlekiklí yáí dodoodo ɔbéɛ, móbwɛ tsun Kristosɔ. ¹⁰ Mu asun ɣáinhé amu gyí, ní bré ámu ifun a, móbwɛ mu atɔ bwehéá íbu ɔsú múa asi fée kulɛ, púwá aní Wíe Kristo asi.

¹¹ Bulu tɛhá mu nwuntɔ asún pú mu apé tɛba mótó brégyíbré. Mu onutó léle aní ɔbéɛ abwée mu abí tsun ania Kristonyɔ ikulɛbwetɔ. Tsúfé alí ɔlɔbwɛ agywun yáí

dodoodo ni. ¹² Ɖlele anɔ agyankpapu ámúb anɔ ansí dun Kristosu ámu ɔbéɛ, abékanfú mu numnyam.

¹³ Alí ilegɔi ha mli é ní. Bré ámúb mlilónu ɔnɔkwali asún, igyi asun wankláán ámúb ɔlɔhɔ mli nkpa ámu, hɔ músú gyi ɔpá mlia Kristonyɔ mlilóbwe kule. Bulu lópu mu Ɖɔɔ Wankíhé amu hie mli nsu, púsúná ání mubú mli, fé alí ámúb ɔleɔɔ yai ɔbéɛ móbwe ámu. ¹⁴ Ɖɔɔ Wankíhé amu gyi ntsɔwasiá idesuná ání anɔ ɔbi béda agyapadiɛ ámúb Bulu léla yáí há mu abí ámu ni. Idesuná ání alaká anɔ nwunsu ɔkɔ, púwá mu numnyam.

Paulo Mpáí

¹⁵ Mú alí su, tsú bréá nonu ání mlilahɔ anɔ Wíe Yesu gyi, pú alíá mlitɔdwé Bulu ahá féé á, ¹⁶ mmɔkúsi Bulu ipán da mli nwunsu. Ní nde mpáí bɔ á, ntekáin mlisu. ¹⁷ Ntokókóli anɔ Wíe Yesu Kristo Bulu, numnyam Ɖsí ámu mbéɛ, ɔhá mu Ɖɔɔ ámu ɔha mli nyánsa. ɔle mu ɔwan súná mli, méni mlébi mu wankláán. ¹⁸ Ntɔkúli mu mbéɛ, obwíi mli ansí, amliwun atɔ wankláán ámúb ɔbéɛ, mlibéki ɔkpa ha ámu, méni mlébi ání atɔ ámúb ɔlelayáí há mu ahá ámu ihíé bu bíá. ¹⁹ Ɖhá amlibi ání mu túmi dun túmi kugyíku há anɔ ahógyipu. Mu túmi ánfɔ ɔma a, kuku má unu. ²⁰ Mú kén ɔlele súná bréá ɔlɔkusúba Kristo tsú afúlito, pú mu yéyáí mu gyɔpɔsu ɔsúsú unu ní. ²¹ Inú Kristo dé iwíe gyí awíe féé, túmi kugyíku, ɔɔɔ laláhe pú ɔmásúgyí túmi féésú ni. Mu dibia dun dibia kugyíkwá ɔbu nu séi pú ɔyi ámúb ɔbéba amutɔ. ²² Bulu lópu tógyítɔ wá mu asɔ, ɔlɔpu mu bwé tógyítɔ nwun há mu ɔpasua. ²³ Ɖpasua ámu gyí Kristo ɔyólú. Kristo wá ɔpasua ámu tenyá túmi kugyíku tsú. Mutéhá tógyítɔ tɔwá alé yi ɔtínegyíótíné.

¹ Asa mlulémlí Akristofó á, asuto-onlun móa lakpanbwe su mligyí ðjéto aha wuhé. ² Alí bré ámutó á, mlulétsiá ðmátófo atsiábi. Mlulóbuo ðje laláhe féé owíe Ðbunsám. Mvgyí ðje laláhe ání ide agyómá yo ahá ámúú butamabú Bulu ámutó ní. ³ Léle mú á, aní féé anlétsiá amú atsiábi, bwé lalahéá aní ðwóli léklé. Anulóbuo tóá aní ðyulúv pú aní agywun létsiá súná aní. Tsiátó anfi sú teki Bulu ðbébití aní isv fé aha atráhe ni.

⁴⁻⁵ Táme íniá Bulu nwewúun itsó, ðtehié dwé aní sv á, ðlòtsun ania Kristonyo ikulebwe sv há aní nkpa, bré ámúú anigyí aha wuhé Bulu ansító aní lakpan sv ámu. Mu awitole sú ðlòhó aní nkpa. ⁶ Ania Kristo Yesunyó ikulebwe ánfi sv Bulu lakúsúa ania mnyo tsú lowuto, alahá aní otsiákpá Kristo wá. Ania mnyo abégyi iwíe ðsósú. ⁷ Bulu léle mu awitole kpònkpònkpònti ánfi súná aní tsun Kristo Yesusu, méni ahá ání bétrá lun féé bówun ání mu awitole lomóni ðvn tógyító. ⁸ Bulu awitole pú mli Kristo hógyisv Bulu lótsun hó mli nkpa. Íni motsú mli, Bulu atokiehé igyi. ⁹ Megyí mli bwehé wankláán kuku sv, méni mlto ðkòkò móòpv ibi sí kántó. ¹⁰ Bulu lábwe aní alí ánfi anigyí. Alabwé aní aha pòpwe tsun ania Kristo Yesunyó ikulebwe sv, méni abóbwe yilé ání mu onutó ðlela yái há aní ðbéé abwéé.

Kristotó ikulebwe

¹¹ Mú sv mlíkaun ání teki ðmátófo mligyí. Bré ámu a, Yudafó butetí mli bæe, “Ahá ání bumetn keté,” bótetí amú iwí keté atínpu. (Táme ketétín amú ó á, nyankpusa ðyulúsv pú ibi ðnó ató igyi.) ¹² Mlíkaun ání alí bré ámutó á, mluméyín Kristo. Afóó mligyí. Mlumégyí Yudafó ðkpagyíðkpasv. Mlumá ogyíkpá Bulu nhíhé ámúú ðleka mú iwí ntam há Yudafó ámutó. Múá idun kúráá á, mli ansí medín tótòsv, mluméyín mu é. ¹³ Táme séi á, mlia Kristo Yesunyó mlílabwé kule. Íni sv Kristo latsun mu

obugya amúɔ ɔletseí wólí há ania mlunyo ámusu, kpá mli ahá ánfí teki mlibu ifó ánfí ba Bulu wá. ¹⁴ Tsúfé Kristo onutó lapú iwilwii wá Yudafo pú ɔmá bábásúfɔ nsiné, bwé aní afunka anyo ámu féé kule. Alalé olu amúɔ ulɔbwe buntíí wá aní nsiné ámu. ¹⁵ Ɖleka Yudafo mbla pú amú amándíétó, méni afunka anyo amú bóɔbwe ɔpasua pɔpwe ikule mutɔ. Fówun mva amúnyo bóɔbwe kule, iwilwii bétsiá amú nsiné. ¹⁶ Ɖlɔtsun mu oyikpalíhesu lowu ámusu lé olu lé amú nsiné. Oyikpalíhe amusu ɔlɔtsun tsuwi amúɔ Bulunyo ɔnó ntsu. ¹⁷ Bréá Kristo lébá a, ɔleɔa Bulu iwilwii asún ámu ɔkan há ahá féé. Mli ɔmátófɔ ání mliɔ Bulunyo nsiné bu ifó pú Yudafo ání amúɔ Bulunyo nsiné ma ifó féétó. ¹⁸ Kristo su ɔkpa latíí há aní afunka anyo ámu féé. Ɖɔɔe Wankíhé ámu su abétalí ba aní Sí Bulu ansító.

¹⁹ Íni su mlitráa mlimégyí afɔɔ. Mliɔ Bulu ahá mlilabwé ikule, mligyí Bulu wóyí abí. ²⁰ Mligyí fé obuá bayi. Yesu sumbí ayɔpú ámu pú Bulu ɔnósú atɔípú amu gyí mú nkpabí. Kristo Yesu onutó gyí obu ámu ɔtan. ²¹ Mu su obu ámu itsa aba hógýitɔ. Mutéhá mú itomóní bwé Bulu ɔtswékpa obu wankíhé. ²² Íniá mliɔ Kristonyo mlilabwé ikule su á, ɔde mliɔ Yudafo ámu pútsá abasu, ɔde obu ání Bulu obétsiá mútó ɔɔétó yíi.

3

Paulo Ɖmá Bábásúfɔ Bulu Asún Bláa

¹ Mí Paulo nda obu Kristo Yesu asun wankláán amúɔ nde ɔkan da mli ahá ání mlimégyí Yudafoɔ ámu su. ² Nyin ání mlilanú awitɔleá Bulu lówa há mí, pú agyómá ánfí wá mí íbítɔ ɔbée, mbwée, iwa labi ha mli. ³ Bulu léle mu asun ɔnínhé amúɔ ɔlekiklí yaí ámu ɔwan súná mí. Mú nawánlín kútúkú á. ⁴ Ní mlekla ɔwólú ánfí a, íbówankí mli ání nanú Kristo iwi asun ɔnínhé amu asi. ⁵ Tsú ɔyí ɔpá á, Bulu mókólé asun ɔnínhé anfi súná nyankpusa ɔkuku. Táme séi ánfí á, alabele mú ɔwan tsun mu Ɖɔɔe ámusu súná

ahá ámúb alalé, bugyi mu sumbí ayɔpú pú mu ɔnósú atóipú wankíhé amu. ⁶ Mu asun ñáinhé amu gyí, Bulu layúlá ɔmá bámbásúfó é fě Yudafo, tsun mu asun wankláán ámusu. Amóba Yudafo bamlí ɔlɛɛ ɔkuletɔ ató agyípú, alabwé amóba Yudafo kule. Mú su babwé ɔyulúv kule. Amú é bénya ató ámúb Bulu léhie ání ɔbéha Yudafo tsun Kristo Yesusu ámu kv.

⁷ Ina Bulu awitɔle pú mu túmisu ɔlɔbwe mí mu asun wankláán ámu osúmpú. ⁸ Ibo mótóá kebikusu ngyi Bulu ahá fěétó. Táme Bulu lówa awitɔle há mí ɔbéɛ, ndáa Kristo oyúla amúb idun blí ámu iwí ɔkan ha ahá ání bumegyí Yudafo. ⁹ Múlówa mí ɔbéɛ, nháa anyánkpúsa fěé abubi alía ɔɔpɛv mu asun ñáinhé amu yó agyómá. Múlóbwe ɔsú múa asi, ɔlɔpɛv mu asún ánti ñáín tsú ɔyí ɔpá. ¹⁰ ɔlɔbwe mú alí, méni ɔbótɛv mu ɔpasua ámusu lé mu nyánsa ɔtsan-ɔtsan súná ɔɛ laláhe awíe pú atúmipvá bubu ɔtínéá buɔe iwíe gyí fěé. ¹¹ Iní gyí tóá Bulu léhuhíe yaí asa ɔlele ɔyí ní. Alahá mú ilaba mótó séi tsun aní Wíe Kristo Yesusu. ¹² Iníá anilahɔ mu gyí, ania munyɔ anilabwé ikule su á, abétalí wá klun yó mu ansító faan, animéetrá nya ifú. ¹³ Mú su nde ipa bwií há mli mbée, mli máha abato iwu mli, iwɔsun ánti ndewúun ha mli ánti su, tsúfě ibówa labi há mli.

Kristo ɔɔwe

¹⁴ Iní su mí akpawunu iyi asi, nde aní Sí ámu kokóli. ¹⁵ Muto abusuan kugyíkvá ibu ɔsú múa asi lelun tsu. ¹⁶ Mubúv oyúla akpɔnkpɔnti há mu abí. Mú su nde mu kokóli mbée, mu ɔɛhé ámu ɔhíe wa mli ɔkláa ɔwɔnlín tsu mu oyúla kpɔnkpɔnti atokiehé ámutɔ, ¹⁷ Kristo ɔtsun mli hógyisu tsia mli klɔntɔ brégyíbré. Nde mu kulí mbée, ɔhá amlile nlín yɔ ɔtótó, Buludwe pú mli abadwɛtɔ, amlilu kínkíínkín. ¹⁸ Fówun mliá Bulu ahá atráhe mlétalí bí ánti Kristo ɔɔwe lehié móní, ilehie téí, ihíé bu iswí, ilehie fúá, ilehie wíe ɔtótó. ¹⁹ Ntráa nde mu kokóli mbée, ɔhá amlíbu

Kristo ɔdwe ámuó nyankpɔsa ɔkuku méetalí nú mú así yi amu. Fówun mli tsiátó bóbwe fé Bulu klé.

²⁰ Ínǎ Bulu túmi de agyómá yɔ anito sv á, ɔtetálí bwé ató há aní dun alǎ anitókólí mv, ntéé anitosúsu. ²¹ Ínǎ sv mliha akanfu Bulu. Anyánkɔsa ulíntó féé bukánfu mv ató akpɔnkɔnti ámuó ɔdebwe Kristo Yesu pú ɔpasua ámuoto ámu sv, tsú séi yófun bréá itamatá. Amen!

4

Ania Kristonyɔ Ikulebwe

¹ Ínǎ sv mí ánfí nda obu aní Wíe agyómá yɔ sv ánfí nde ipa bwíí há mli mbéé, mlitsía tsiátó oduá ulékanáa alǎ Bulu léle mli ɔbéé, mlíbetsiá. ² Mlɔba iwiasí, amlilwii. Mlɔnya klun ha aba, amlidwe aba. ³ Ɖɔɔe Wankíhé amu lahá mlilabwé kule. Mú sv mlɔbo mbódí amlitsia iwilwiitɔ, méni ikulebwe ámu íbetsiá mlito yó. ⁴ Ɖyulúv kule iwí ntobí aní féé anigyí. Ɖɔɔe Wankíhé kule pé bu unv. Alí kén Bulu léle aní féé ɔbéé, abéku toku kule pé ɔkpa ní. ⁵ Owíe ɔkule; hógyi kule; asúbo kule. ⁶ Bulu ɔkule. Mogyí aní féé Ɖsí. Mudé aní féésú gyí, ɔde agyómá yɔ tsun aní féésú, otsie aní féétó.

⁷ Kristo lówa awitɔle ye atokiehé há aní féé ɔbéé, apúyɔ mu agyómá, ⁸ fé alǎ bɔwanlín wá Bulu asún ámuoto beé, “Bréá ɔlɔyɔ ɔsúsú á,

ɔlekpa ndoun buo iwí,
kíé ahá ató.”

⁹ Ní bɔwanlín wá Bulu asún ámuoto beé, “Ɖlɔyɔ ɔsúsú” á, idesuná ání Kristo légyankpá kplí wíe ɔsulúto. ¹⁰ Mómú idesuná ání ɔhá ámuó ɔlekplí wíe ɔsulúto ámu kén lóyɔ ɔsúsú, ɔtíneá ulɔfá dun ni, méni ɔbóbulá ɔsú mǎa así féé, há mú ifun. ¹¹ Kristo onutó lóbwe anito aku mv sumbí ayɔpú. Aku Bulu ɔnósú atáipú. Aku mv asun wankláán ámu ɔkan adapú. Aku é akpapú pú asunápú. ¹² Kristo léle amó alí, méni Bulu ahá bétalí yó mv agyómá, púwá Kristo ɔyulúv ikule; ígyi mv ɔpasua ámu ɔwunlín,

¹³ ménì anì fée abóbwe kule hógyitò, bí Bulu mu Bi ámu. Fówun abédan, fun òkpagyíòkpasu fée Kristo. ¹⁴ Ìni su animéetrá bwe fée nyebíá ahá aní amó onó bu òdwe bétalí pú amó atosunáhé pòpwe kugyíku bemlé, fée aliá ntsu tedá òklun ya òtínegyíòtínéá ideklé. ¹⁵ Mboún mliha abláa aba òòkwali asún ámu òdwetò, ménì abédan tógyítótó, bwé fée Kristo, ogyi òpasua ámu nwun. ¹⁶ Ìna musu òyulùv, igyi òpasua ámu òtínegyíòtíné ita aba, ide aba wankláán. Ní nyankpusa-oyí iwí ntobí ámu fée ide mú agyómá yò wankláán á, Kristo tehá mú itedan òdwetò.

Nkpa Dada Múa Pópwe

¹⁷ Mú su nde mli òlá da anì Wíe idátó mbée, mli mátrá tsiá fée ahá aní bumeyín Bulu. Itáá móowa labi há amó iwí butògywún. ¹⁸ Amó nwuntò lóklun. Mú su buma nkpa pòpwe amóv itsú Bulu wá ámu, tsúfée bumeyín tòtò. Ìkìvntò bu amó odwin. ¹⁹ Lalahé bwe tamawá amó péli, butekle hakpanla kugyíku bwe. Butòbwé lalahé kugyíku, butamatálí kítá iwí.

²⁰ Táme mli mú á, megyí tsiátó anfi odu mli lékasí tsú Kristo iwí. ²¹ Nyin aní mli anú Yesu iwí asún, basúná mli òòkwaliá ibu mvtò é. ²² Mú su mli si mli tsiátó dada amóv mli létsiá ámu. Mli òwólí lalahé lémlé mli alí bré ámvtò, ìleha mli tsiátó leyintá. ²³ Mliha Bulu òbwe mli klun pú mli agywun pópwe. ²⁴ Mli tsiá tsiátó pòpweá igyi Bulu atsiábi, mú iwí letin, ìna dínká òòkwali òkpa ámusv.

²⁵ Mú su mli tò okugyíòku òmátrá wa afunu. Òhagyíòha òbláa mu ba Okristoyin òòkwali. Tsúfée anì fée anígyí nyankpusa-oyí òkule amu iwí ató. ²⁶ Òbló ìkítá mli á, mli máha mú ìha amlí bwe lakpan. Ìmátsiá mli tò yófun owi tahé. ²⁷ Mli mátepi há Òbunsám òkpa òmle mli, amlí bwe lakpan. ²⁸ Owikplu mátrá wi ató. Òpúv mu ìbi yò agyómá, ménì obénya tòku kpá mu iwí, nyá ìku é há ahá aní buma kòku. ²⁹ Mli máha asun lalahé kòku ìdalí tsu mli onó.

Mboún múá íbóbvá ðha, íbóbwe yilé, wá labi, wá mú anupú ðwunlín. ³⁰ Mlumábwe tóá íbéhan ðhe Wankíhé amv. Tsúfé mu Bulu lópuhie mli nsu, pósúná ání mobú mli, móhō mli nkpa eke ámu ni. ³¹ Mliē ðnsipekpan, olu pú ðblókpán, itré, isia pú lakpan kugyíku agywun le mliṭō. ³² Mboún mliwa awitōle ha aba. Mliwun aba nwe, amlisi lakpan kie aba fé alí ámbú Kristo su Bulu lési mli klé kíé mli ámu.

5

Akristofō Atsiábi

¹ Íniá Bulu abí ání ðtehíé dwé mligyí su á, mlitsia mu atsiábi. ² Mliḍwe aba ðkpagyíðkpasu, fé aliá Kristo lóḍwe ani, tsúlá bōmō mu ani su. ðlōpu mu iwí bwé atō hahé pú afōḍie-abotóá íbu ðfan fánfáánfán há Bulu, ilegyi mu ansí.

³ Bulu latin mli iwí. Mú su mliumāwa atsi múa ayin asón, wá hakpan, ntéē ðnsípe. ⁴ Mú ðma a, uma aleá mléblí asún ání íbu péli pú múá uma anulé, ntéē wá ðplōkpan. Mboún mliḍa Bulu ipán brégyíbré. ⁵ Íwánkí mli ání mbva ðtōpú, ðhakpan ntéē ðnsípe ðwapú ðkuku méenya ogyíkpá Kristo muva Bulu iwíegyi ámutō. (Tsúfé ðnsípe ðwapú gyí fé ðkpi ðtswépu).

⁶ Mliumāha ðkpa ðhaa ðpúv asún ání uma labi kuku mlé mli. Tsúfé tsiátó laláhe anfi odu sú Bulu tenyá ðbló bíti ahá ání bobv asutō-ònlín isv ní. ⁷ Mú su mliúmpu amú gyi mba. ⁸ Bré ámu a, oklúntō mlitsie mliḍé lakpan bwe, táme séi á, mliia ani Wíenyō mliḍabwé ikule. Mú su mlitsie wankitō. Íni su mli tsiátó isúna ání mlitsie wankitō. ⁹ Tsúfé ðhá ání ðbu wankitō tōbwé yilé. Mu asún da ðkpa, ðbu ðnōkwali. ¹⁰ Mú su mliḍō mbódí amlikasí tóá Bulu tekle. ¹¹ Mliumāgyi mba. Labi kuku uma mútō. Mboún mliē amú bwehé ðwan. ¹² Íhíé bu péli ání béblí ntobíá ahá butōbwé ñaintō iwí asún kóráá. ¹³ Táme ní itō wankíhé íwánkí wólí

tóá ibu oklúntəsu á, itemlí itowunhe. ¹⁴ Tsúfé atə wankíhé telé tógyító əwan. Mú só beblí beε,
 “Ədidípú, tsinki.

Kusu tsu afúlito,
 Kristo əwanki wuli fúsú.” ni.

¹⁵ Ini su mliki mli tsiátó wankláán. Mlumátsiá nkpa fé aha mimláhe, mboún mltsia fé atiansipv. ¹⁶ Ní mlenyá bréá mlópubwé ito wankláán á, mlumáyintá mú. Tsúfé lalahεwε lamóní alí bré ánfito. ¹⁷ Mú su mlimábwε mimlála. Mboún mlibə mbódí amlibi tóá aní Wíε tekle, amlibwε mú.

¹⁸ Mlumánu ntá bú, tsúfé iteyíntá əha. Mboún mliha Əhε Wankíhé amv əbula mli brégyíbré. ¹⁹ Mlipv Bulu asún wá ulv, amlíwa ulvá Əhε Wankíhé lópwá mli kluntə putəi kpla aba; amlíwa ulv é tsu mli kluntə kanfv aní Wíε. ²⁰ Mlída aní Sí Bulu ipán tógyítótó brégyíbré, aní Wíε Yesu Kristo idátó.

Akristof Akúlu Múa Aká Tsiátó

²¹ Mliba iwiasí ha aba fé alíá mliteba iwiasí há Kristo.

²² Ətsi, ba iwiasí ha fú kúlu fé alíá futeba iwiasí há Kristo.

²³ Tsúfé okúlu bv túmi mv kasv, fé alíá Kristo bv túmi əpasua ámvsv. Əpasua ámv gyí mv əyulúv, Kristo amv onutó gyí mú Əlepú. ²⁴ Alí ámvú əpasua ámv teba iwiasí há Kristo amv a, alí kén əká é əbá iwiasí ha mv kulu tógyítótó ni.

²⁵ Akúlu, mliđwε mli aká fé alí ámvú Kristo lóđwε əpasua ámv, tsúlá bəmə mv mú sv ámv. ²⁶ Kristo lótsulá bəmə mv pútín əpasua ámv iwí há Bulu. Olebie əpasua ámv ntsu, pú mv asún ámv gyóra mú iwí. ²⁷ Omekleá ifin pú asvansv bétsiá əpasua ámv iwí, ntée mú ətunεkú ibókpvkpúv tíá, méní ibówa mv onutó ámv akíε fé obitebí, əbékpa mv ba mv iwí wá. ²⁸ Alí kén lehián ání oyin əbódwε mv ka fé mv iwí ní. Oyin ání ətəđwé mv ka təđwé mv onutó iwí. ²⁹ Tsúfé əhaa tamalú mv iwí, bulá ətebúlá mv iwí, kí mv iwísv wankláán fé alíá Kristo é təbwé há əpasua ámv.

³⁰ Tsúfē aní fēé anigyí Kristo ɔyulúw iwí ntobí. ³¹ Fé alíá bōwanlín wá Bulu asún ámutò bēe, “Ínì sù oyin ɔbénatí sí m̀v̀ s̀ m̀v̀a m̀v̀ ỳn, yémantá m̀v̀ kasu. Fówun amú abanyó ámutò bóbwe ɔyulúw kulé” nì. ³² Ɖnɔkwali, Bulu asún ñaíñhé anfitò b̀v̀ odwin. Ndekú mbéé, Kristo m̀v̀a ɔpasua ámutò iwí asún igyi. ³³ M̀lì é m̀lì asún igyi. Mú s̀v̀ ntráa nde m̀lì bláa mbéé, oyingyíoyin ɔdwéé m̀v̀ ka fé m̀v̀ onutó iwí, ɔtsi é obu m̀v̀ kulu.

6

Abí Múa Akwíró

¹ Abí, m̀lì a nì Wíenyɔ m̀lìlabwé kulé. Mú s̀v̀ m̀lìbu m̀lì akwíró. Tsúfē múgyí t́á ida ɔkpa ání m̀lìbwe ní. ² Ínì gyí m̀blá ámutò gyankpapv́a ɔlɛɛ oyúla mántá músú ní. “Bu f́ó sí m̀v̀a f́ó ỳn, ³ m̀éni íb́wa alé há f́ó. Fówun f́édan fulí ǹwun f́ó nkpa ánfítò.”

⁴ Abí así, m̀lìmátsiá wá m̀lì abí ɔbló. Mboún m̀lìyáí amú, amlisuna amú ató alíá aní Wíe tekle.

Nkpábi Pó Amú Awíe

⁵ Nkpábi, m̀lìbu m̀lì awíe. M̀lìnya amú ifú, amlìbu amú tsu m̀lì kluntò fé alíá m̀lìtobú Kristo. ⁶ M̀lìmábwe yilé amú ansító alíá b́ékanf́ó m̀lì s̀v̀. Táme fé Kristo nkpábi a, m̀lìbwe ató tsu m̀lì kluntò fé alíá Bulu tekle. ⁷ M̀lìlè iwítò ỳ ɔ agyómá ansigyísú ha amú, fé Kristo m̀lìd́é mú ỳ há, megyí nyankpusa. ⁸ M̀lìdinka ansí ání aní Wíe ɔb́éka ɔhagyíɔha ikó, itó wankláán kugyíkv́a ɔlɔbwe s̀v̀. Ní ɔkpaí fugyi o, fútsie f́ó iwí s̀v̀ o.

⁹ Awíe, m̀lì é m̀lìkita m̀lì nkpábi wankláán, fé alíá nablí b́ɔtsun. M̀lìmábwe amú kpóunkpóun. M̀lìkaun ání m̀lì a amúnɔyò f́éé owíe ámutò b̀v̀ ɔsúsú. M̀v̀ mú ɔtamakí ɔhaa ansító.

Bulu Akɔt́ó

¹⁰ Mí asún tráhe-tráhe gyí, apíó, mlitsun ania anu Wíenyə ikulebweso amluha mu əwa mli əwunlín tsu mu túmi kponkponti ámutə. ¹¹ Mludida isá-akotó féeá Bulu lahá mli əbée, mlipúko Əbunsám, méni mlétalí líi mu əmle ámu ənó. ¹² Tsúfé megyí ania anyánkpusa déko. Mboún ania əhétó túmi laláhe, atúmipvu pú əhe laláheá bubu əyí klúnhe anfitə pú ətínegyíətíné déko. ¹³ Mú sv mludida Bulu akotó ámu fée, méni ekeá lalahe kv ifwíe mlitə á, mlíméesrí, mlétalí líi mú ənó, trá nya əhə wá əwunlín líi kínkíínkín.

¹⁴ Mú sv mlíkusu, amlida iwísv. Ənəkwalíwa íbwée əféá íkli mli osíésú. Yilébwé íbwe mli kántó-atíntə. ¹⁵ Iwísvuda há iwílwii asun wankláán ámutə kitá pú mú blí íbwée mli isátó ntukuta. ¹⁶ Íni fée əma a, mlíkita Kristo hógyi amutə brégyíbré. Íbwée mli atíntəá mlóputin mli íwi, méni Əbunsám mbun píónpíón ámúú ídetsóvn amutə kuku ímóəwə mli. ¹⁷ Mlípvu Bulu nkpahóə amu bwe mli kutupa. Mlíkita Bulu asún ámutə, íbwe mli isátó ədayí aní Əhe Wankíhé amu tehá mli. ¹⁸ Mliha Bulu Əhə ámu əkpa mli, amlibə mpái brégyíbré. Mlíkvli Bulu, ətsa mli əkpagyíəkpasv. Mú sv mlídinka ansí iwísv. Mlíması mpái bə há Bulu ahá fée. ¹⁹ Mlíbə mpái ha mi. Ní nobwíí ənó á, Bulu əpúv mu asún ámu wa mí ənó; əha mí antali wa klvn bli asun ηáínhé amúú íbv mu asun wankláán ámutə ámu fée. ²⁰ Asún ámu íwi sumbí əyəpú ngyi. Mú əkanda sú nda obu ní. Mlíbə mpái mliha, Bulu əhá mí antali wa klvn bli mú alá ílehián.

Íklá

²¹ Osúmbi ənəkwalípvu anu píó ədwepú Tihiko gyí anu Wíe agyómá ámutə. Əbébláa mli mí íwi asún fée, méni mlébu alá ngyi pú tóá ndebwe. ²² Íni kóun sv nde mu wa mli wá ní. Ndeklé mbée, əbebláa mli alá tógyító íde músó yə nfi. Ətəi kpla mli powa mli əwunlín.

²³ Ɔsí Bulu mva anɩ Wíe Yesu Kristo buháa mli ahógyipu amu féé iwilwii. Buháa amlitsia dwe aba, mli ansí idinka Bulusu bré féé. ²⁴ Ogyíi ahá ání butamasí anɩ Wíe Yesu Kristo dwe féé buale.

Bulu ntam pɔpwe; Nkonya
New Testament in Nkonya (GH:nko:Nkonya)

copyright © 2010 Wycliffe Bible Translators, Inc.

Language: Nkonya

Translation by: Wycliffe Bible Translators, Inc.

Nkonya

nko

Ghana

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nkonya

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 13 Mar 2019 from source files dated 13 Mar 2019

01b09958-fa53-51d1-aae0-88c7e9302503